



6. december 2011

Inatsisartut Suleriaasianni § 37 naapertorlugu Naalackersuisunut apeqquq imaattoq matumuuna saqqummiuppara:

Naalackersuisunut apeqquq:

- 1. Kalaallit Nunaata siunissami qarasaasiani paasissutissaatinik toqqorsivinngorsinnaanissaa Naalackersuisut qanoq isumaqarfigaat?**
- 2. Naalackersuisut nunani allani qarasaasialerisunut attaveqarnikuuppat, Kalaallit Nunaata siunissami qarasaasiani paasissutissaatinik toqqorsivinngorsinnaanissaa pillugu?**

(Inatsisartunut ilaasortaq Justus Hansen, Demokraatit)

Tunngavilersuut

2008-mi Tele Greenland nunami maani qarasaasianut paasissutissaatinut toqqorsiveqalernissaq/serverparkeqalernissaq isumalluarfigalugu oqaatigaat. Tele Greenlandimi Teknikkeqarnermut pisortaq ulloq 22. august 2008 Aviisimut Ingeniørenimut ilaatigut imatut oqarpoq:

”Kalaallit Nunaanni nammattorsuarmik issimi peqarpugut. Taavalu serverinik ataavartumik nillertumiititsinissaq pingaaruteqarluarmat, eqqarsaatigineqarsinnaavoq, Kalaallit Nunaata piffissap ingerlanerani qarasaasiani paasissutissaatinut imaluunniit serverparkinut angerlarsimaffinngorsinnaanissaa. Nunanut allanut mingutsitsillutik innaallagialu atorlugu nillataartitsiviliortariaqartussanut naleqqiulluta imeq kuuginnartorsuaq annertoq atorlugu avatangiisinut innarliinngitsumik nukimmik pilersitsisinnaavugut.”

Demokraatini Tele Greenlandip qulaani isummersuutai isumaqatigilluarpagut, tamannalu tunngavigalugu ilisimatitsissutigissavarput IT-mik ingerlataqarfissuaq angisooq Facebook sverigep avannaani illoqarfimmi Luleå-mi illorsualiulernikuummat, qarasaasiakkut paasissutissanik qitiusumik toqqorsivissamik. Illorsualiaq immikkoortunik pingasunik servereqarfissanik illutaqassaaq tamarmik immikkut 28.000 kvadratmeterinik annertussuseqartussanik.



Facebookip oktoberimi nalunaarutigaa, Luleå ilaatigut toqqarneqarsimasoq illoqarfiup nillataartumiinnera pissutigalugu. Silap pissusaata nillertup kinguneranik serverit pinngortitamit nillataartinneqartassapput, tamannalu nukinnik atuinikkut sipaarutaangaatsiartussaavoq.

Taamaasilluni Luleåmut inissiineq, Facebookimut, pinngortitamut/silap pissusaanut aammalu Luleå-mut niuernitsialaavoq.

Naatsorsuutigineqarpormi ukiuni aggersuni Facebookip qarasaasiani paasissutissaatinut toqqorsiviliornermut atatillugu 3 aamma 4 milliarder koruunit akornanni aningaasaliissutigiumaarai. Illoqarfimmi sanaartornerup iluani suliffiit nutaat 300-t pilersinneqassapput, taavalu qarasaasiani paasissutissaatinut toqqorsivik naammassippat naatsorsuutigineqarpoq suliffiit ataavartut 50-60-t pilersinneqarumaartut.

Kalaallit Nunaanni silap pissusaa qarasaasiani paasissutissaatinut toqqorsiviliorifigissallugu allaanerunngilaq taamaattumik soqutiginarutut isigaara paasissallugu, Naalakkersuisut pineqartumut tunngasunik eqqarsaatersuuteqarsimanersut.

Apeqqutit akeqquneqarput ullut suliffiit nalinnaasut qulit iluanni.